

2018-imi meeqqanut angerlarsimaffiup avataanut inissitanut neqeroorutit amerlipput

Suliniut "Meeqqat tamarmik angerlarsimaffeqarnissaminnut pisinnaatitaaffeqarput" aqqutigalugu Kalaallit Nunaanni Red Barnip meeqqat angerlarsimaffiup avataanut inissitat angajoqqaavisalu nuannersumik misigisaqaqatigiittarnissaannik neqeroortalerniarpoq.

'Meeqqat tamarmik angerlarsimaffeqarneq pisinnaatitaaffigaat' qulequtsiullugu suliniut 2016-imi aallarnisarneqartoq Kalaallit Nunaanni Red Barnip Kommuneqarfik Sermersuullu suleqatigiinnerisigut piviusunngortinneqarpoq.

Meeqqanut angerlarsimaffiup avataanut inissitanut angajoqqaavinullu iluaqutaasussanngorlugit sammisassat pikkorissaanerillu eqqortut inerisarneqarsinnaanissaat anguniarlugu assigiinngitsunik ilinniagallit arlallit suliniummi peqataatinneqarput. Neqeroorutit 2018-imi atorneqarsinnaanngorlutik piareernerat Kalaallit Nunaanni Red Barnet-ip Kommuneqarfiullu Sermersuup nuannaarutigaat.

"Meeqqat angerlarsimaffiup avataanut inissinneqartut angajoqqaavisalu atugaasa nukittorsarneqarnerat siulittaasut nuannaarutigaara, suliniutillu aningaasatigut annertuumik tapersorsorneqarnera Kalaallit Nunaanni Red Barnet-ip qujamasuutigaa" - Kalaallit Nunaanni Red Barnimi siulersuisuni siulittaasoq Jonna Ketwa taama oqaaseqarpoq.

Kalaallit Nunaanni Red Barnip Kommuneqarfik Sermersuullu suleqatigiinnerat angerlarsimaffiup avataanut inissiisarnermi iliuusissanik ataatsimut isiginnittunik pilersitsinissaq inuinaat, politikikkullu suliaqartut pisortallu suliaasa ikorfartoqatigiinnissaannik nukittorsaqatigiinnissaanillu kissaateqarneq tunngavigalugu piviusunngorpoq.

"Kommuneqarfik Sermersuumi pingaartittorujussuarput ataatsimut isiginnittumik suleriaaseqarnissaq, ilaqutariillu sanngiinnerusut ilaquttaminnut attaveqaataasa nukittorsarnissaat. Taamaattumik Kalaallit Nunaanni Red Barnilu suleqatigiinnissatsinnut qilanaartorujussuuvugut, suleqatigiinnitsigut ilaqutariit sanngiinnerusut ataatsimoorluta ikiorluarsinnaaniassagatsigit, innuttaasunullu sanngiinnerusut allanngueqataanerussaalluta" - Meeqqanik Ilaqutariinnillu sullissinermi pisortaq, Tina Dam Rasmussen Kommuneqarfik Sermersuumeersoq oqarpoq.

'Meeqqat tamarmik angerlarsimaffeqarneq pisinnaatitaaffigaat' qulequtsiullugu suliniut misiliutaavoq, kingorna nunatsinni illoqarfinnut arlalinnut siammarneqarnissaa siunertaralugu aallaqqaammut Nuummi saqqummiunneqaqqaartussa. Suliniummi meeqqanut angerlarsimaffiup avataanut inissinneqartunut pingaaruteqarnerpaat eqqarsaatigineqarmata suliniummik ingerlatsinermi angajoqqat angajoqqaarsiallu ilaatinneqarput.